

Sarajevo će trajno održati Olimpijski plamen – on nas veže s naprednim ljudima svijeta...”

U svojoj slavljeničkoj besjedi sarajevski gradonačelnik Uglješa Uzelac dodao je nove emocije:

- „...U ovaj grad u kojem će sutra početi najveličanstvenija manifestacija mladosti i mira, stranci su vijekovima donosili vatru da ga pale i unište, a on je odolijevao vatri i vijekovima, padao i dizao se, gorio i izgarao, da bi se kao feniks iz pepela ponovo rađao.

Ovaj put plamen nam je izdaleka stigao, ali ne da nagovijesti sukobe i stradanja već vitešku borbu mira na bijelim tepisima našeg Sarajeva, sa nadom da će ubuduće ovakvih bitaka biti sve više, a onih drugih, pogubnih i neljudskih, sve manje...”

VAREŠ POZIVA SVIJET

Talasi nabujalih sarajevskih emocija počeli su sve snažnije da zapljuskuju i druge dijelove Bosne i Hercegovine. Osjećanja ljudi u cijeloj zemlji da Sarajevo na ogroman i veličanstven način, organizući Igre, šalje svijetu ništa manje velike i značajne ljudske poruke, prerasta u neku vrstu bastiona uzleta vlastite samouvjerenosti.

U tom pogledu ni u široj međunarodnoj javnosti nije ostala nezapažena ideja mladih iz Vareša, koji su, sa redakcijom sarajevskog „Oslobođenja”, predložili svjetskim liderima da dani Olimpijskih igara u Sarajevu istodobno budu i dani mira u svijetu, kao što su bili i u drevnoj Heladi.

Sam šef jugoslovenske države, predsjednik Predsjedništva SFRJ Mika Špiljak prokomentarisao je pred domaćim i stranim novinarima inicijativu vareških mladića i djevojaka ovim riječima:

- „...Inicijativa mladih iz Vareša je simbolična, ali je sa velikim simpatijama pozdravljena kako u našoj zemlji, tako i širom svijeta. Takve ideje mladih izražavaju sve odlučnije zahtjeve i običnih ljudi za zaustavljanje sve opasnijeg konfrontiranja sile i oružja. To što takva raspoloženja ispunjavaju naručito mladi je sasvim razumljivo, jer su za njih mir, sloboda i prijateljstvo sinonim progresa, budućnost i mladost. Olimpijada je sama po sebi praznik mladosti, trijumf čovjekovog duha i tijela, ali i težnja ka zbližavanju i prijateljstvu omladine i uopšte ljudi, i onih koji će sa njima biti na Olimpijadi ili ih pratiti u svim krajevima svijeta. Činjenica da su se ovdje u Sarajevu na jednom mjestu okupili mnogobrojni sportisti, ljubitelji sporta, turisti i novinari iz cijelog svijeta – svojevrsna je demonstracija mira i prijateljstva.”